



XUNTA DE GALICIA

CONSELLERÍA DE PRESIDENCIA,
ADMINISTRACIÓNS PÚBLICAS E XUSTIZA
Secretaría Xeral Técnica

ANTEPROXECTO DE LEI DE CREACIÓN DO COLEXIO OFICIAL DE DIETISTAS - NUTRICIONISTAS DE GALICIA.

EXPOSICIÓN DE MOTIVOS

De conformidade co disposto no artigo 150.2 da Constitución Española, a Lei Orgánica 16/1995, de 27 de decembro, de transferencias de competencias á comunidade autónoma galega, transfire no marco da lexislación básica do Estado, o desenvolvemento lexislativo e a execución en materia de Corporacións de dereito público representativas de intereses económicos e profesionais, complementando así o ámbito competencial determinado no artigo 27.29 do Estatuto de Autonomía de Galicia.

A transferencia en materia de colexios oficiais ou profesionais fíxose efectiva a través do Real Decreto 1643/1996, do 5 de xullo e asumíuse polo Decreto 337/1996, do 13 de setembro, da Xunta de Galicia.

A Comunidade Autónoma de Galicia ditou en virtude da devandita competencia a Lei 11/2001, de 18 de setembro, de colexios profesionais da Comunidade Autónoma de Galicia. De acordo co seu artigo 11 a creación de colexios profesionais, no ámbito territorial da Comunidade Autónoma de Galicia, farase por lei do Parlamento galego.

Ao amparo desta normativa as persoas representantes da Asociación Galega de Dietistas e Nutricionistas, presentaron solicitude de creación do Colexio Oficial de Dietistas-Nutricionistas de Galicia.

O Real Decreto 433/1998, do 20 de marzo, establece o título universitario oficial de Diplomado en Nutrición Humana e Dietética, e as directrices xerais propias dos plans de estudos conducentes á obtención daquel. Conforme ao devandito real decreto, o título terá carácter oficial e validez en todo o territorio nacional e as ensinanzas conducentes á súa obtención deberán proporcionar unha formación axeitada nas bases teóricas e nas técnicas de elaboración dos réximes alimenticios axeitados á nutrición humana.

A Lei 44/2003, do 21 de novembro de ordenación das profesións sanitarias, en relación coas profesións sanitarias tituladas, establece no artigo 2 que son profesións sanitarias tituladas e reguladas, aquelas cuxa formación pregraduada ou especializada se dirixe específica e fundamentalmente a dotar ás persoas interesadas dos coñecementos, habilidades e actitudes propias da atención da saúde, e que están organizadas en colexios profesionais oficialmente recoñecidos polos poderes públicos de acordo co previsto na normativa específica aplicable, e inclúe expresamente entre as profesións sanitarias de nivel diplomado, a profesión de Dietista Nutricionista, para cuxo exercicio habilita o título de Diplomado en Nutrición Humana e Dietética.

A mesma Lei no artigo 7.2.g) sinala como funcións dos Dietistas-Nutricionistas, o desenvolvemento de actividades orientadas á alimentación da persoa ou de grupos de persoas, adecuadas ás necesidades fisiolóxicas, e, no seu caso, patolóxicas das mesmas, e de acordo cos principios de prevención e saúde pública.

Mediante Resolución do 5 de febreiro de 2009, da Secretaría de Estado de Universidades, publícase o Acordo do Consello de Ministros do 23 de xaneiro de 2009, polo que se establecen as condicións ás que deberán adecuarse os plans de estudos conducentes á obtención de títulos que habiliten para o exercicio da profesión regulada de Dietista-Nutricionista. O dito Acordo ten por obxecto, en virtude do disposto no artigo 12.9 do RD 1393/2007, do 29 de outubro, polo que se establece a ordenación das ensinanzas universitaria oficiais, determinar as condicións ás que deben adecuarse os plans de estudos conducentes á obtención de títulos universitarios oficiais de Grao que habiliten para o exercicio da profesión regulada de Dietista-Nutricionista.

En cumprimento do previsto no apartado cuarto do devandito acordo, posto en relación coa disposición adicional novena do RD 1393/2007, do 29 de outubro, por Orde CIN/730/2009, do 18 de marzo establécense os requisitos para a verificación dos títulos universitarios oficiais que habiliten para o exercicio da profesión de Dietista-Nutricionista.

Considérase que existen razóns de interese público concorrente na creación deste colexio profesional, determinadas pola profesión obxecto de colexiación, como profesión sanitaria regulada e titulada dirixida á cidadanía no seu conxunto, promovendo hábitos de vida saudables e exercendo unha importante labor nas actividades orientadas á alimentación de persoas e grupos de persoas,

adecuadas ás súas necesidades fisiolóxicas e/ou patolóxicas, de acordo cos principios de prevención e saúde pública.

A creación do Colexio Oficial de Dietistas-Nutricionistas de Galicia, constitúe un instrumento de garantía na adecuación do exercicio profesional ás normas e regras que aseguren a protección dos dereitos e intereses dos consumidores e usuarios dos servizos dos seus colexiados, ordenando o exercicio da profesión e o seu control deontolóxico, así como as eventuais responsabilidades nas que poidan incurrir os profesionais no desenvolvemento da súa actividade.

Polo exposto, e considerando que existen razóns de interese público que xustifican a necesidade e oportunidade de creación do Colexio Oficial de Dietistas-Nutricionistas de Galicia, procédese mediante a presente Lei á creación do dito colexio.

A lei consta dunha exposición de motivos, catro artigos titulados respectivamente: obxecto, ámbito territorial, ámbito persoal, colexiación, dúas disposicións transitorias e unha disposición derradeira.

Artigo 1. *Obxecto.*

1. Créase o Colexio Oficial de Dietistas-Nutricionistas de Galicia, como corporación de dereito público, con personalidade xurídica propia.
2. O Colexio terá plena capacidade de obras desde o momento no que se constitúan os seus órganos de goberno.

Artigo 2. *Ámbito territorial.*

O ámbito de actuación do colexio é o territorio da Comunidade Autónoma de Galicia.

Artigo 3. *Ámbito persoal.*

O Colexio Oficial de Dietistas-Nutricionistas de Galicia agrupa aos profesionais que estean en posesión do título universitario oficial de Diplomado en Nutrición Humana e Dietética, obtido de conformidade co disposto no Real Decreto 433/1998, de 20 de marzo, polo que se establece o título

universitario oficial de Diplomado en Nutrición Humana e Dietética e as directrices xerais propias dos plan de estudos conducentes á obtención daquel, ou os títulos que habiliten para o exercicio da profesión de Dietista-Nutricionista de conformidade co Acordo do Consello de Ministros do 23 de xaneiro de 2009 e a Orde CIN/730/2009, do 18 de marzo, ou outro título estranxeiro equivalente debidamente homologado pola autoridade competente.

Artigo 4. *Colexiación.*

O exercicio da profesión de Dietista-Nutricionista con domicilio profesional único ou principal na Comunidade Autónoma de Galicia, requirirá a incorporación ao Colexio Oficial de Dietistas-Nutricionistas de Galicia, cando así o estableza unha lei estatal.

Disposición transitoria primeira. Comisión Xestora

1. A Asociación Galega de Dietistas-Nutricionistas, designará unha Comisión Xestora, que actuará como órgano de goberno provisional do colexio coas funcións establecidas na normativa transitoria desta Lei.

Na designación das persoas integrantes da Comisión Xestora procurarase acadar unha composición equilibrada de mulleres e homes.

2. A Comisión xestora, no prazo de seis meses a partir da entrada en vigor desta lei, aprobará uns estatutos provisionais do Colexio Oficial de Dietistas-Nutricionistas de Galicia. Nos citados estatutos deberá regularse a convocatoria e o funcionamento da asemblea colexial constituínte, na que terán dereito a participar todos os profesionais que, conforme ó disposto na presente lei, poidan adquirir a condición de colexiados. A Convocatoria da asemblea constituínte deberá anunciarse como mínimo, con vinte días de antelación no Diario Oficial de Galicia e nun dos xornais de maior difusión de Galicia.

Disposición transitoria segunda. Asemblea constituínte e estatutos definitivos

1. A Asemblea Constituínte, no prazo de seis meses dende a aprobación dos estatutos provisionais, elaborará e aprobará os estatutos definitivos do Colexio Oficial de Dietistas-Nutricionistas de Galicia, e elixirá ós membros dos órganos colexiais.

3. Os estatutos definitivos, logo de seren aprobados pola asemblea, remitiranse á consellería competente en materia de colexios profesionais para os efectos da súa aprobación definitiva, logo da cualificación da súa legalidade, e publicaranse no Diario Oficial de Galicia.

Disposición derradeira única. Entrada en vigor

Esta Lei entrará en vigor aos vinte días da súa publicación no Diario Oficial de Galicia.

14) Memoria xustificativa.